

S A M Þ Y K K T

um hundahald á Akranesi.

1. gr.

Hundahald er bannað í bænum að undanteknum leiðsöguhundum til hjálpar blindu fólki og leitarhundum til aðstoðar björgunarsveitum.

2. gr.

Bæjarstjórn er þó heimilt að veita einstaklingum búsettum í bænum, undanþágu til hundahalds að uppfylltum eftirtöldum skilyrðum:

1. Hundurinn skal skráður á skrifstofu bæjarins. Þar fær eigandi afhenta merkta plötu, sem jafnan skal vera í ól um háls hundsins. Á plötuna skal grafið Akr. og númer.

Við skráningu skal hundeigandi undirrita yfirlýsingu um, að hann skuli í einu og öllu fara með hund sinn eftir fyrirmælum samþykktar þessarar, eins og hún er nú eða kann síðar að verða.

2. Skylt er hundeiganda að hafa hund sinn ábyrgðartryggðan hjá viðurkenndu vátryggingarfélagi, þannig að tryggt sé, að trygging taki til alls tjóns, sem hundur kann að valda, án nokkurra óeðlilegra skilyrða, að mati bæjarstjórnar.
3. Hundurinn skal aldrei ganga laus á almannafæri, heldur vera í taumi í fylgd með aðila, sem hefur fullt vald yfir honum. Eigi er heimilt að hafa með sér hund, þó í taumi sé, inn í skólahús, almennar skrifstofur, samkomuhús, leikvelli eða verslanir, svo og starfsstöðvar hverju nafni sem nefnast, þar sem úrvinnsla, meðferð eða geymsla matvæla á sér stað.
4. Hundaeigendum er skylt að sjá svo um, að hundar þeirra raski eigi ró manna, né verði þeim til óþæginda.
5. Skilyrði fyrir hundahaldi í húsum þar sem íbúðir eru fleiri en ein er, að allir húsráðendur húss samþykki slikt. Skal leggja fram skriflegt samþykki þar um við skráningu hunds, er gildi þar til bæjarstjóra berst skrifleg afturköllun frá einhverjum húsráðenda.
6. Til að standa straum af kostnaði bæjarsjóðs af skráningu og eftirliti með hundum, skal árlega greiða leyfisgjald til bæjarsjóðs fyrir þá hunda, sem undanþága er veitt fyrir. Gjaldið greiðist fyrirfram við skráningu hundsins til 1. júlí og síðan árlega á sama tíma. Bæjarstjórn ákveður upphæð þessa gjalds í upphafi hvers árs.

Við greiðslu gjalds þessa ber hundeiganda að sýna fullgild skilríki fyrir greiðslu vátryggingargjalds samkv. 2. tl. þessarar greinar, vátryggingarskírteini, vottorð dýralæknis um að hundur sé ekki haldinn smitandi sjúkdómi og hafi verið hreinsaður af bandormum, svo og önnur skilríki er máli skipta samkv. lögum um hundahald og varnir gegn sullaveiki svo og fyrirmælum, sem heilbrigðisnefnd setur varðandi hunda. Hundar, sem blindir menn og öryrkjar þurfa á að halda vegna fötlunar sinnar, svo og leitarhundar, eru undanþegnir leyfisgjaldi, en eru að öðru leyti háðir ákvæðum 2. gr.

3. gr.

Við minni háttar brot á samþykkt þessari skal hundeigandi sæta skriflegri áminningu og greiða allan kostnað er leiðir af brotinu. Ef um alvarlegt brot, eða ítrekað, er að ræða, er heimilt að afturkalla viðkomandi undanþágu til hundahalds, og varðar það sektum, sem geta numið allt að sömu upphæð og ársgjaldinu til bæjarsjóðs.

4. gr.

Hundar úr aðliggjandi sveitum, sem ekki eru í fylgd með eiganda eða umráðamanni og ómerktir eru, svo og aðrir ómerktir flækingshundar, skulu teknir úr umferð. Gefi eigandi sig ekki fram og eða vitji hans innan tveggja sólarhringa, hefur lögreglan heimild til þess að lóga viðkomandi hundi þegar í stað. Merktir hundar á flækingsi skulu einnig teknir úr umferð. Ef eigandi vitjar hans eigi innan tveggja sólarhringa og svarar ekki til saka um brot á samþykkt þessari, sé um slíkt að ræða, hefur lögreglan heimild til þess að lóga hundinum, án frekari fyrirvara. Leyfi til viðkomandi eigenda skal þá falla úr gildi og eigi endurnýjast.

Eigendur hunda, sem teknir eru úr umferð, skulu greiða áfallinn kostnað við vörslu þeirra. Ef uppvíst verður um óskráðan hund, skal eiganda hans gert að greiða árgjald til bæjarsjóðs, að viðbætti sekt samkv. 3. gr.

5. gr.

Lögreglustjóri og heilbrigðisnefnd hafa eftirlit með hundum samkv. samþykkt þessari og skulu þessir aðilar tilkynna bæjarstjóra án tafar um allar kærur, sem þeim berast vegna meintra brota á samþykktinni.

6. gr.

Ofangreind samþykkt bæjarstjórnar Akraness staðfestist hér með samkv. lögum nr. 7/1953 um hundahald og varnir gegn sullaveiki og lögum nr. 12/1969 um hollustuhætti og heilbrigðiseftirlit til þess að öðlast gildi þegar við birtingu. Jafnframt falla úr gildi eldri samþykktir varðandi hundahald á Akranesi, sem fara kunna í bága við samþykkt þessa.

Heilbrigðis- og tryggingamálaráðuneytið, 8. janúar 1980.

F. h. r.

Páll Sigurðsson.

Ingimar Sigurðsson.

AUGLÝSING

um staðfestingu á aðalskipulagi Hellu.

Samkvæmt skipulagslögum nr. 19 21. maí 1964 hefur ráðuneytið hinn 2. janúar 1980 staðfest uppdrátt af aðalskipulagi Hellu í Rangárvallahreppi Rangárvallasýslu.

Uppdráttur þessi hefur hlotið þá meðferð sem lög nr. 19/1964 gera ráð fyrir og hefur verið samþykktur af hreppsnefnd Rangárvallahrepps og skipulagsstjórn ríkisins. Jafnframt er úr gildi felldur skipulagsuppdráttur Hellu sem staðfestur var 2. apríl 1954.

Félagsmálaráðuneytið, 9. janúar 1980.

F. h. r.

Hallgrímur Dalberg.

Hólmfríður Snæbjörnsdóttir.